

V c
2071



h. 20, 51 (Nr. 20151)

V c
2071

Son Marggraff Albrecht von Brandenburg.

Warhafftige Zeittung / Der sich vnbedacht seiner Ehren vnd pflicht / vnter erdichtem schein / mutwilliglich vnd freuenlich / wider den Churfürsten zu Sachsen / vnd Burggrauen zu Magdeburg / zuuerdrückung warer Christlichen Religion / als ein Feind / eingelassen / durch Gottes gnedige schickung / sampt dem Landtgrauen von Leuchtenburg / mit allem irem Kriegsvolck / zu Ross vnd fus / vmb vnd bey Kochlitz erlegt / vñ gefangen worden sind.

M. D. XLVII.



102103.23

Darfflich Nach dem/dem Churfürsten zu Sachsen/ gegen Altdenburg do sein Churf. G. mit Irem Kriegsvolck gelegen/ Kundschaft einkomen/ wie das Hertzog Moritz/ Marggraff Albrechten mit fünffzehen hundert Pferden / vnd zehen starcker Fenlein Knechte / darunder sechs des Marggraffen / vn̄ die andere vier des Keisers gewesen sein / gegen Rochlitz gelegt / also er dann Schlos vnd Stadt aus deme / das Hertzog Moritz der Hertzogin / des Landtgrauen Schwester / so ihr leibgeding also hat / dasselbige zubeschutzen vorschrieben / vnd ihrer S. G. anderst nit haben bekommen mügen / ins Keisers vnd Königs namen auffgefördert / solchs eingenomen / vnd mit berürtem volck besetzt / Inn meinung zu seinem vorteil also zuligen / wie er sich dann des ortz sicher zu sein geacht / getantz / gesprungen / vnd leichtsinnig gewesen sein sol.

Als ist der Churfürst aus Gottes des Allmächtigen schickung / den Dienstag nach Inuocavit gegen abendt vmb fünff vhr rettigt worden / vnd mit etzlichen seiner Churf. G. Reutern vnd Knechten / auch geschütz / vnd zugehöriger Munition eilendt die nacht vber den nechsten auff Rochlitz gezogen / Do dann sein Churf. G. des Mittwochs frue / vnd vor tag ankomen / vnd Hertzog Ernst von Cünenburg / Graff Volradt zu Mansfeldt / Sampt Wolffen von Schönberg / seind mit etlichen geschwader Reutern im vorzuge gewesen / Darauff Jörg von Reckenradt mit seinem



nein Regiment geordnet vnd gezogen ist.

Dieselbe Vorwarth vnd Reuter / haben als bald frue vnd vor tags inn ihrem anzug Jörgen Scheurschlos mit etzlichen Pferden abgefertiget / zuuersuchen ob er den Feinden inn die wache fallen / die auffheben / vnd ihr losung erfahren möchte / Die also hinein gesetzt / vnd vier des Marggrauen Reuter auff der Schiltwach gefangen / Die andern aber / Nach dem sie statlich verordenet gewest / haben die flucht inn die Statt Kochlitz gegeben / Darauff erst gegen dem tag etzliche des Marggrauen Reuter heraus gezogen / vnd sich neben den vier Keiserischen Fendlein / so inn der Vorstatt gelegen / auch andern Dackenschützen / die aus der Statt ihnen zugeordnet gewesen / etwas hefftig vnd mit ernst erzeigt / Haben auch zwey mal inn einander weidelich troffen / das ein lust zu sehen gewest / aber doch ist es auff beiden seiten nicht lehr abgegangen / vnd sind auff des Feindes seiten / vmb grosses meher / dann auff des Churfürsten blieben / vnd des Marggrauen Reuter sind allwegen inn ihrem vorteil inn die Vorstatt zu ihren schützen gewichen / vnd die flucht nicht allein nach der Statt zum Thor zu gegeben / Sondern auch ir viel sind durch ein zimliche hohe lück / so an der Statzmauren eingefallen / inn die Statt gerant vnd geflohen.

Als aber der Churfürst mit dem mittel zuge / wiewol etwas langsam hernacher kommen / vnd auff die Feinde gerückt / Auch das geschütz auff den Bergt heraußer lagern / vnd weidelich hinein inn die Statt gehen lassen / darzu Dackenschützen

A ij hinein

hinein bracht / welche sich ernstlich mit denen inn
der Vorstadt berochen / vnd die Vorstadt ange-
zündet / inn des sind die Keiserischen vier Fendlein
vber die Brück der Mulden / vnd etzliche Reuter
durch das wasser geflohen. Als bald man solchs
vormerckt / sind des Churfürsten Knechte inn die
Stadt gefallen / haben die geplündert / vnd dem
Feinde das geschütz darüber abgelauffen.

Weil ihnen nuh inn der Stadt / also hart zuge-
setzt / vnd mit macht auff sie hinein gedrungen ist
worden / hat sich Marggraff Albrecht mit etz-
lichen Pferden / auch dauon machen / vnd von der
Fastnacht freude ausdrehen wollen / Wie er dann
bereit durch das Wasser die Mulden kommen ge-
west sein sol / Aber durch sonderliche schickung
des Allmechtigen zugetragen / das er durch Herz-
zog Ernst von Lünenburg antreffen vnd gefan-
gen / der ihne also dem Churfürsten / als ein gefang-
nen Man / zu seiner Churf. G. handen vberant-
wort hat. So ist Landtgraff Christoff von Lens-
chtenberg im ersten angriff auch gefangen vnd ges-
schossen worden / Desgleichen Jörg von Doers-
den / vnd andere mehr fürneme haupt vnd beuelhs-
leute vom Adel vnd andern / zu hafft des Churf.
genommen / deren namen man noch alle nicht hat
wissen mügen.

Die Reuter so noch inn der Stadt Rochlitz
gewesen / sampt den Marggraffischen sechs Fend-
lein Knechte / die wol bewert vnd gerüst gewest /
haben sich inn der Stadt zum stand gethan / Aber
weil sie gesehen das sie vbermanet / sich inn des
Churf. Gnade ergeben / Die sein Churf. G. also an
vnd

vnd aufgenommen / vnd haben als bald / auf beschene
anzeige / alle jr weher vnd harnisch so sie zimlich
gut gehabt / von sich legen / dohinten lassen / vnd
darzu schweren müssen / wider den Churf. vnd sei-
ne aynungs vorwandten in sechs Monatt nicht
zuthun / noch zuhandeln / welchs sie denn also ge-
lobt vnd zugesagt / Ihnen auch also werlos abzuzie-
hen vergünt ist worden.

Nach dem aber die vier Keiserischen Fendlein /
wie oben gehört die flucht geben / welchs ein volck
gewest / aus allen Nationen zusammen geklaubt /
darunder viel Spanier / vnd Whalen gewest / da-
mit man itzo die Edele Deudsche Nation zuuerhe-
ren vnd zuuorderben für hat / vnd die selben neben
den Dussiern vnd Türcken / darumb in Deudsche
Landt gefüret werden. So hat man doch densel-
ben nachgeeilet / die inn der flucht antreffen / vnd
bis an wenig personen vast alle / durch Gottes
verhengung erlegt vnd gefangen / vnd sonderlich
sollen der Whalen vnd Spanier wenig darvon ko-
men sein / Das also der gefangene Marggrane Al-
brecht / mit etzlichen Fahnen Kentern / deren Ken-
tern / seinem selbst bericht nach / fünffzehen hun-
dert / vnd sechs Landknecht Fendlein / der vier
tausent gut gewesen sollen sein / durch Gottes gne-
dige schickung vnd hülff / sampt dem Landtgrauen
von Leuchtenburg / zu diesem mal erlegt / vnd darzu
vierzehen stück büchssen / gros vnd klein / auff redern
erlangt sind worden.

Solehs alles ist seher schwinde / eilendt / vnd
ernstlich zugangen / vnd hat gewehret / von fünff
vhr des Morgens / bis auff den Mittag / Es sind

A iij auch

auch inn der Niderlage/ die wol einer Kleinen schlacht
zuuorgleichen / auff des Churfürsten seiten nicht
viel blieben / allein der gute alte vnd ehrliche Ritter
Herr Wolff Ditterich von Pfirdt / hat inn solcher
niderlag die schulden des Todes bezalt / welcher
durch den Leib geschossen / vnd Christenlich inn
Gott etzliche tage hernacher verschieden sein sol.
Nach ergangenen scharmützeln / hat man die / so
tod blieben / vngenerlich abzelen lassen / vnd inn der
Statt Kochlitz ein tausent / herausen vnd inn dem
wasser der Mulden / bis inn dreyhundert Todter
Cörper befunden / darunder auff des Churfürsten
seiten vber hundert nicht blieben / Vnd ist also
Gott dem Allmechtigen für solche / vnd andere
seine wolthaten / billich zum höchsten zu dan-
cken. Dem sey auch Lob / Ehr vnd Preis / in
ewigkeit Amen / Geschehen den andern Martij.
Anno Domini M. D. XLVII.

Nach solchem / ist der Churfürst mit den sei-
nen widder von Kochlitz nach Aldenburg gezo-
gen / Die gefangen Fürsten vnd andere mit sich ge-
fürt / vnd werden also inn solcher Niderlage bey
den Feinden allerley Practicken / Anschlege / Man-
dat / vnd beneich befunden / Welche von dem
Papist / seinen Cardineln / auch etzlichen Bischof-
fen / vnd derselben anhengenden vntrewen Pfaf-
fen / vnd Pfaffengesinde / fürnemlich herrüren vnd
dahin gericht sind / vnter einem gedichten schein /
die ware Christenliche Religion / darzu sich der
Löbliche Churfürst zu Sachsen / neben etzlichen
mehrer des Reichs loblichen Stenden vnd Steten
bekennen zuuortruckten / auszutilgen / vnd die Lob-
liche

liche Deudsche Nation inn ein Blutbade / vnd
ewig vorderb zusetzen vnd zubringen / wie sie dann
solches angefangen / vnd weiter / wie man vor
merckt / vnd wils Gott / ferner an tag gegeben sol
werden / im sinn haben / Der Allmechtig aber wol
le solcher vntrew vnd bösen Practiken weren / sein
arme Kirchen / widder ihre Feinde / vnd das Blut
durstige Pfaffengesinde / wie bisher gnediglich
schützen / vnd der Deudschen Nation die gnade
vorleihen / das sie einsten die augen recht auffthuen /
Gott mit ernst anruffen / vnd sich trewlich bey
einander finden lassen / Damit sey ein je
der Ehrliebender Deudscher ges.
warnet / vnd Gott bes
nohlen .

1702. 2071


Faint, illegible text, likely bleed-through from the reverse side of the page.

me



(x2206275)





20,51 (Nr. 20151)

V c
2071

Son Marggraff Albrecht von Brandenburg.

Warhafftige Zeittung / Der sich vnbedacht seiner Ehren vnd pflicht / vnter erdichtem schein / mutwilliglich vnd freuenlich / wider den Churfürsten zu Sachsen / vnd Burggrauen zu Magdeburg / zuuerdrückung warer Christlichen Religion / als ein Feind / eingelassen / durch Gottes gnedige schickung / sampt dem Landtsgrauen von Leuchtenburg / mit allem irem Kriegsvolck / zu Ross vnd fus / vmb vnd bey Rochlitz erlegt / vñ gefangen worden sind.

M. D. XLVII.

